



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 10

Syria mitkar tekolakbai
Jordan semdang

WTA rankings: Naomi Osaka
top 5 nungi tuguogo



VOL. XVIII NO. 339 (ADOK 339) DIMAPUR

SANGTENNÜ (TUESDAY)

RONGJUI (SEPTEMBER) 21, 2021 ₹ 5.00

Naga yimten teblemetsü atema telemetba ka dang agitsüla: Nikki Sumi



Nikki Sumi

Dimapur, September 20, 2021 (TYO): Indo-Naga yimten teblemetsü atema telemetba ka dang agitsüla ta NSCN/GPRN president Nikki Sumi-i ashi.

Hombarnü Hotel Saramati nung osangbener den senden ka amendang "Naga yimten latettsüba ya Naga yimten teloktem masü saka Naga nung ket nung lir. Anungji Naga nung ajaki telemetba ka agitsüba kanga tongtipang" ta Nikki Sumi-i ashi.

"Onoki nübertemi ashiba ama telemetba ka atema inyaktüsü. Nübertemi lemteba sülen onok anidaktüsü. Naga nungeri ola ka agi takhangba agüja telemetba ka dang agitsüla" ta paisa shisem.

Naga nungeri yimten teloktajak ka kuma longjemer Centre den olemtepdaktüsü. Iba ajanga Naga yimten latettsü imlar, ta Nikki-isa ashi.

"Onoki Framework Agreement

asere Agreed Position anema menokdaker. Ajisüaka onoki ano takhangba balaka agütsür, khuret talila adoktsü" ta paisa ashi.

"Naga nung telok asem- NSCN-IM, NNPGs aser ozü telok külemi sabang ka nung adenshiba ajanga dang ajak densemba telemetba ka agitetsü. Telok asemprong sabang ka nung sentetsü atema ni pusemer, ajisüaka onoki NSCN (IM) mesüra NNPGs den melokteptsü" ta Nikki-i ashi.

Naga nung longjemtsüla aser ola ka agi dang asenok taginüba ashitsüla Naga yimtenren teloktem dang masü saka Naga nung ajak longjemtsüla aser yimjung nung alitsü atema lenmang lapoktsüla, ta Nikki Sumi-isa metedaktüsü.

"Nagalang nung tax onsara saruba ajanga public aser shishilembartem kangshir. Iba khuret Naga yimtenren teloktem ajanga dang masü saka overground nisungtemia tax saruba ajanga lir. Ajisüaka, tatembang telemetba ka magi tashi nübertemi tax agütsütsüsa akümtsü" ta paisa ashi.

"Nübertemi tax mesüra tenla magütsüra onoki kodaser sorkar ketdangtsüa aotsü?" ta Nikki-i asüngdang.

NSCN/GPRN Nikki Sumi-i September 8, 2021 nü India sorkar den küm ka atema ceasefire tenangzüktep agiogo.

NE nung COVID-19 ajanga nisung teimba asüdakji Nagaland

Dimapur, September 20, 2021 (Agencies): Northeast Region nung Nagaland nung COVID-19 ajanga nisung teimba asi. Iba ya September 18, 2021 nü Nagaland Health Department-i COVID-19 data agütsüba nung ajemdaker asadangba lir.

Nisung 100 shia asüba nung ajemdaker case fatality ratio (CFR) ya asadanger. Nagaland nung COVID-19 puteta alir nisung 653 süogo.

Linük nung Maharashtra, Punjab, Uttarakhand aser Goa den külemi Nagaland ya CFR teimtiba aliba state tem lir ta health department-i metedaktüsü.

Nagalang nung sample positivity rate 2.2% lir aser tang 'green zone' nung lir.

Northeast nung COVID-19 puteta anepalur teimtiba alibaji Mizoram lir aser parnok sülen Assam, Arunachal, Tripura aser Nagaland lir.

MHRC-i police dang NSCN-IM ket nungi RTI activist kümzüksü tuyur

Guwahati, September 20, 2021 (Agencies): Manipur Human Rights Commission (MHRC)-i RTI activist nisung 4 kümzüka ayutsü atema police dang shiogo.

NSCN (IM) telungpurtemi mang ayangtsü tsüba agi RTI activist pezü atsüka lir.

Rights activist Wahengbam Joykumar Singh-i MHRC tsüngdang ken o ka benokba nung ajemdaker MHRC-i Manipur DGP aser Special Secretary (Home) dang RTI activist pezü lendong nungi jenbua alitsü atema tesem ka bushitsü tetuyuba agütsü.

Iba ken o mebantet tashi Constitution kübok nisung taküm alitsü temeten agüja aliba ama parnok kümzüka ayutsüla aser iba denji achiajem peria agütsütsüla, ta MHRC-isa ashi.

National Human Rights Commission (NHRC)-i iba ken o MHRC nem ketdangtsütsü agütsü.

"Nagalang den arrotsü aliba Senapati district nung alirtem- Kh Enoch, P. Johnson, S.P. Benjamin aser P.R. Amose nung March

2020 nungi NSCN (IM)-i amokmerena arur. State sorkari terenlok mapa inyakba dak sendakba nung parnok RTI ka ajanga osang metettsü asüngdangba sülen NSCN (IM)-i par pezü amokmerentsü tenzük" ta MHRC acting Chairperson Khaidem Mani-i ashi.

"Yaküm January 20 National Socialist Council of Nagalim (Isak-Muivah) züngsem kari Enoch apu aser anogo 8 tashi parnok ket nung reshikangshia liasü. Parnoki pa dang RTI application meyipa agitsü rongshi aser iba jagi tatem nung pai pa indang application meyipa agi" ta Mani-isa metedaktüsü.

Enoch amokmerenba aser reshikangshiba osang angashir Senapati District kübok Taphou Phymai yimer parnok 31-i RTI activist tem pusemba sayua RTI application 31 agütsü.

Commission-isa Director General of Police aser Special Secretary (Home) dang iba ken o atema mapa inyaktüsü aser telangzüba agütsütsü shiogo.

BAN-i Nagaland nung totzü atsüteta rongsen akümtsü ayongzükter

Dimapur, September 20, 2021 (TYO): Business Association of Nagas (BAN)-i Minister of State for Petroleum & Natural Gas, Labour & Employment On Siesmic Survey Operation and Studies, Rameshwar Teli dang Nagaland nung aliba ali rongsen ajanga rongsenkettsüing jenjang ajungkettsü atema shidi ka zülüogo.

BAN-i Minister Rameshwar Teli dang Assam aser Nagaland tsüngda lemsatepa totzü bushitsü aser atsütetsü atema DAB (Disturbed Area Belt) lapoktsü ashi.

Nagalang nung arua mapa inyaktüsü atema state sorkari PSU/NOC nem PEL license agütsütsü atema Centre sorkari state sorkar nem temelaba agütsütsüla, ta BAN-isa ashi.

"Assam-i crude oil nungi royalty ama sen crore aika

aazükter saka Nagaland-ibo anogoshia oil revenue nung Rs 5 crores shi akoksar ta Nagaland nungi Lok Sabha MP Tokheho Yephthomi-i Assam-Nagalang arrotsülen totzü atsüteta indang sangdong ka nung shia lir" ta BAN-isa Minister Teli dang ashi.

"Onoki linük indang GDP nung tongti shilem agir ka süner. Nagaland nung ali rongsen jenti moaja lir saka infrastructure shitak maliba ajanga linük nung state tamajungba kümogo. State-i sen apuba teimba akümer aser rongsenkettsüing jenjang kangasa majung lir. Nagaland nung totzü atsüteta sen maküm nungbo tarutsü nung sen arulen kecha malitsü" ta BAN President, L Mongkum Jamir aser General Secretary, Dr. Yan Murry nati shidi nung shia lir.

"Onoki meshimetsüa dangbo melitetsü anungji industry ajanga

rongsenkettsüing maparen inyakba ajanga Nagaland aser linük nung mapa inyaktüsü maongka aser terenlok bentsür arutsü" ta BAN-isa metedaktüsü.

Tarutsü anogotem linük tulutemi energy atema tanga lenmangtem bushia amshira, crude oil indang jenjang samatsü. Anungji iba ama tensa ka nung Nagaland nung aliba ali rongsen odang yutsütsüba kanga magizükter, kechiyong tang itemji shitak amshira state ajanga nung melenshitsü. Anungji state sorkari tetsükdaktüsü kecha magütsü Nagaland nung totzü alidak bushitsü aser atsüteta rongsen akümtsü atema mapa inyaktüsüla.

Centre-ia tenokdangba ajak agientsüla aser state tejakleni aoba den linük yangerba mapa nung Nagaland nem-a shilem agidaktüsüla" ta BAN-isa shidi nung ashi.

Küm ka sülen Naga yimjung olemtep tenzükogo

Kohima, September 20, 2021 (Agencies): Küm ka shi lir külen India sorkar atema interlocutor aser Naga Helungpur teloktem tsüngda Hombarnü nungi Naga yimten teblemetsü atema olemtep tenzükogo.

Hombarnü Chumoukedima nung aliba police complex nung taoba Intelligence Bureau (IB) special director aser interlocutor A.K. Mishra aser NSCN (IM)

tsüngda senden ka amen.

2015 küm Framework Agreement sign asüba nung aliba ama mapa ajak inyaka aotsü, ta NSCN-IM lennir Rh Raising-i senden amenba sülen ashi.

"Onoki Framework Agreement nung nangzükba ama inyaktüsü. Covid-19 wara sülen olemtep tenzükogo. India sorkari shidi ka nung Mishra-i onok den olemteptsü indang ashi" ta

Raising-i ashi.

"Wako aser temzüng medeni tenangzüktep agiba magizükter aser ibaji tetezü kecha mali. Ajak dena telemetba ka agitsüla. Ozü züngsemtem taginüba toktsür tenangzüktep nung sign masütsü" ta paisa ashi.

Ajisüaka, Mishra aser NSCN-IM lennirtemi tanü senden amenba indang osang yimjak nung metedaktüsü.

Nagalang Congress-i state sorkar anema 'crusade' tenzüksü

Dimapur, September 20, 2021 (TYO): Nagaland Pradesh Congress Committee (NPCC) president K Therie-i anir züngsemtemi state sorkar anema crusade tenzüksü.

September 25 nungi Dimapur nung iba sentong tenzüksü aser Nagaland kübok tesem ajungalen agitsü.

"September 25, 2021 nungi Dimapur nung Congress-i sorkar anema crusade tenzüksü aser taküm küm tsüngda district ajak nung agitsü. Küm 18 tashi opposition nung dang lia arur aser onok ket nung crusade agitsü atema senotsü mali. Anungji nübertemi tenla agüja nungjitsü mepishir" ta NPCC-isa ashi.

Nisung kati Rs. 2000 tashi tenlatsü ozüngi melar. Iba dang

nungi teimba tenlanürtemi Scheduled Banks den electoral bonds ajanga tenlatsü akok. Onoki totzü aser achiajemtsü atema dang tenla meshir, ta parnokisa metedaktüsü.

"Asenoki temelenshi ka bener marura state sorkari yimten teblemetsü atema telemetba magitetsü. Tanabuba nung asen tamangba yimsü lendong nung lir. Asenok meilongi Khristan yimsü nungi pila aoer aser tamanger aikati Khristan inyakyim mebenshir. Parnoki süngyanglu külemer aser asen tamangba yimsü tangatetba anema külemküja asür" ta NPCC-i tanü sangdong ka nung ashi.

Congress-i public taginübatem atema ola adokba dak alaka sorkar memelenshitsü

asere Nagaland mekümzükteptsü. Temelenshi bener arutsüba tashiji nübertem ket nung lir. Sorkari Nagaland nung alirtem ya sen agi alizüktertem ama züngshir aser Naga nungertemia sen aser tashi tsübur. Asenoki ochi aser tangatetba tajung atema noktaktüsü tasümaim kümogo, ta NPCC-isa metedaktüsü.

Lia aodang Nagaland arrotsü melenshitsü ama tsüba bilemer. Ano sorkar aika asüba ajanga asen lima nung ayawara tia ajurutsü, ozüng alema inyakerem aser auertem tali adoktsü tsübur. Nagaland nung ochimashi ajanga takar aser sensaker kanga bendangogo aser iba ajanga tensa tamajung ajurutsü akok, ta NPCC-isa metedaktüsü.

COVID-19 Nagaland: 43 dak putet, 55 taneptsü angu & 1 asü

Kohima, September 20, 2021 (TYO): Nagaland nung nisung 43 dak COVID-19 aliba putet aser parnok züngsema nisung ajak agi 30,907 kümogo.

"Tesüba ghonda 24 tsüngda nisung 43 dak COVID-19 putet. Parnokji Tuensang nung 14, Dimapur nung 13, Mokochung nung 8, Kohima nung 3, Kiphire o Longleng nung anana (2) aser Wokha nung 1 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Kasa mapang COVID-19 puteta alir nisung 55 taneptsü

angu. Parnokji Dimapur nung 36, Kohima nung 9, Wokha nung 8 aser Zunheboto nung 2 lir" ta paisa ashi.

Tang tashi nung nisung 28,835 taneptsü nguogo aser ibaji 93.29% lir, ta paisa shisem.

Tang COVID-19 puteta nisung 467 anepaludar aser parnok rongnung nisung 348 dakbo shirangba yimya kecha mali, ta Dr Kikon-isa metedaktüsü.

Hombarnü Dimapur nung COVID-19 puteta alir ka asü aser iba nisung züngsema tasür ajak agi 654 kümogo.

"Deobar tashi nung nisung

677,200 nem COVID-19 vaccine indang dose 974,010 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,914, healthcare workers 15,993, arishi küm 45 ser temapur 196,251 aser arishi küm 18 nungi 44 tsüngda alir 404,042 lir" ta paisa metedaktüsü.

"Vaccine agirtem rongnungi nisung 296,810-i dose anaprong agiogo. Parnokji frontline workers 46,892, healthcare workers 13,175, arishi küm 45 ser temapur 127,195 aser arishi küm 18 nungi 44 tsüngda alir 109,548 lir" ta Dr Thurr-isa ashi.

KROS College nung kaketshir aniokba sentong agiogo



KROS College nung kaketshir aniokba sentong agiba noksa nung angur.

Dimapur, Rongjui/Sept. 20 (TYO): KROS College nung September 14-18, 2021 anogotem nung kaketshir tasenpur atema Student Induction Programme agia liasü, kong Student Council aser Department balala indang orientation agi.

Iba sentong mezüing anogo nung topper temi tajungshi o

jembia liasü aser tasüngji personality development aser pei sasa pei meimtsüba indang mentor aser mentee tsüngta sensaksema liasü.

Anogo tasemnü buba nung mapang amshiyim, angaba aser jembiba yimyatem aser assignment züluba indang kaketshir nem angazükdaksü.

Pezünü buba nung kaketshir tasenpur aser tejenpur tsüngta volleyball aser basketball asaya liasü.

Iba sentong tatempangba anogo nung painting, essay, sketch nung toktepba aser sempet sayaba sentong agia liasü. Item tetoktepba nung takok angur nem sempet agüja liasü.

Wokha nung Communitisation of Public Institution & Services senden ka amen

Dimapur, Rongjui/Sept. 20 (TYO): Yimtsüing sasep tangatetba agitsü aser tesüiba küm 19 nungi 20 tsüngta Communitisation koma inyaka arur ta metettsü atema Communitisation of Public Institution & Services pur district level senden ka Wokha nung mena liasü.

Iba dak sendakba nung department tem dang sector ajak nungi mapa shidak inyakba aser meinyakba yimtsüngtem shimteta survey agitsü shiogo, ta Panel for Review of

Communitisation of Public Institution & Services Act 2002 indang Chairperson, Banuo Z Jamir IAS (Rtd) ajanga senden nung metetdaksü.

Wokha nung September 20, 2021 nü iba senden nung jembiba mapang, yimtsüing sasep nung Communitisation ajanga terenlok tsütsü shilem agiba indang metettsü sorkar tangatetba lir, ta Jamir-i ashi, kechiaser yimtsüing renlokba ajanga state renlokba metettsü.

Laisa shimteta aliba yimtsüngtem nung survey agiba

mapang sendaktepa aliba department temi asüngdangtsü tem agütsü, aser item tasüngdangba ya October 15, 2021 tashinung agütsütsü shia liasü.

Chairperson, Banuo Z Jamir IAS (Rtd) ya meina Member Secretary Panel for Review of Communitisation of Public Institution & Services Act 2002, John Lohe aser dangartem oa liasü. Iba senden nung Deputy Commissioner, Wokha, Orenthung Lotha menden liasü.

Kuhuboto block nung yimtsüing lenirtem den ODF Plus indang sensaksem aka



Dimapur, Rongjui/Sept. 20 (TYO): Dimapur nung aliba Kuhuboto block kübok yimtsüing 15 nungi lenirtem den Swachhata Samvad (sensaksemba) sentong ka September 20, 2021 nü Kuhuboto Town Hall nung PHED (Rural) division, Dimapur ajanga ayongzüka agia liasü.

India nüjiso ngur küm 75 ajungba biletmeta aser Azadi Ki Amrit Mahotsav (AKAM) nung shilem ka ama Dimapur district nung aliba yimtsüing ajunga nung Open Defecation Free (ODF) Plus amshitsü asoshi pangzüing yanglutsü nükjidong nung iba sentong ya linük

ajunga nung agia liasü. SDO, Kuhuboto block Er. Myanbemo Ovung ajanga ODF Plus indang yimyatem lemsatp aser yimtsüing nung tekolakpur, talisa GB, Village Council, Water and Sanitation Committees aser ano lokti tentet balala nung lenirtem dang pei yimtsüing nung ODF atema senden mena pangzüing yanglutsü ajungshia liasü.

Paisa lenirtem dang August 25, 2021 nungi tenzüka anogo 100 campaign mapang soak pits amshitsü ayongzüka liasü.

District Coordinator, District Water and Sanitation Mission

(DWSM), Imojungla Longkumer-i iba senden nung New Plastic Waste Management Amendment Rules 2021 onük nung jembi aser Single Use Plastic (SUP) mamshitsü ayongzüka liasü.

Laisa lenirtem dang janareja mashi nung meindoktsü aser tema nung marogtsü ajungshia liasü.

SUP samadaksütsü atema Dimapur nung aliba yimtsüing ajunga nung community level awareness campaign tenzükogo aser ozüing agi melaba ama plastic jana timi ketdang asütsüla, ta laisa ashi.

Motor Vehicles Commissionerate melenshiogo

Dimapur, Rongjui/Sept. 20 (TYO): Motor Vehicles Department indang Commissionerate of Motor Vehicles Department, New Capital Complex nung aliba Department office building-i belenogo.

Ajungji Department office den osang-ola agiteptsü atema Commissionerate of Motor Vehicles Department, New Capital Complex, Kohima-797004 den tongteprateptsüla, ta sangdong ka ajanga metetdaksü.

DC Peren ajanga ki-o-jen kibur dang totuyuba agütsür

Dimapur, Rongjui/Sept. 20 (TYO): Nagaland Land (Requisition and Acquisition) Act 1965 ajanga tashi agüja alibatem amshia, Deputy Commissioner/District Collector Peren, Sentiwapang Aier, NCS ajanga Peren-Dimapur lenmang 2-Laning yangluba nung Km 126.775 nungi Km 146.208 (length 19.433 Km) tsüngta telemsa balala kübok compensation ngur aliba ki-o-jen kibur (Nija,

Sorkar aser danga agency tem) dang iba sangdong adokba anogo nungi it aka tsüngta pei li azüngtsütsü metetdaksüogo.

Iba anogo sülenbo osang talila magütsüi shia aliba lenmang yanglutsü atema National Highway and Infrastructure Development Corporations Limited (NHIDCL) kibur akumtsü, ta Deputy Commissioner ajangasa metetdaksü.

Security Forces temi Dimapur nung NSCN (R) züingsem ana apu



Dimapur, Rongjui/Sept. 20 (TYO): Osang tejangja ka nung ajemdaker Security Forces temi State Police den lungjemer Thilixu village, Dimapur nung September 20, 2021 nü operation ka agiba mapang NSCN (R) züingsem ana apu aser tena ket nungi point 32 pistol ka den magazine ka, 9mm magazine ka, injang 32 aser

NSCN (R) indang vehicle tax collection booklet tem den danga documents kar nguteta liasü, ta sangdong ka ajanga ashi.

Iba dak sendakba nung maneni bushisüngdangtsü atema pua alir nisung ana den tena ket nungi ngutetba oset ya Diphupar Police Station, Dimapur nem agütsüogo, ta sangdong ajanga ashi.

Peren-Dimapur NH 129A (Pkg-2) yanglu tenzüker

Dimapur, Rongjui/Sept. 20 (TYO): NHIDCL (MORTH) Peren District, Nagaland kübok M/S. Hi. Tech Construction & Co den lungjemer C Gopal Reddy and Company ajanga 2 Lane Road Project Peren-Dimapur NH 129A (Pkg-2) yanglu tenzüka sentong ka September 20, 2021 nü Base Camp, Old Jalukie nung agia liasü.

Paisa company dang bendanga agütsür inyaktsü ajungshi aser ano lenmang tajungtiba nung yanglutsü mepishia liasü. Maneni Deputy Commissioner ajanga civil society aser sendaktepa alirtem dang maneni tangatetba kasa nung yariteptsü ajungshia liasü.

Iba sentong nung Zeliangrong Baudi tir C.R Zeliang, Zeme Council tir Dr. Tumda Newme aser Village Council Chairman, Old Jalukie nungertemia jembia liasü.

Iba sentong nung EAC Jalukie, Wangan Phom menden liasü aser Managing Director, CGR and Company ajanga tarur pela agizükba o jembia liasü.

Maneni Tsüingrem temoatsü meshia Rev. Hevziebe, Jalukie 'B' Baptist Church ajanga sarasadem.

Iba sentong nung jembuba mapang, company nungi 2-Lane Road (Pkg-2) yanglutsü maangka anguba ya Naga nung aser talisa Peren district kübok Zeliang nüburtem asoshi temoatsü lir, kechiaser iba lenmang ya ajanga Peren district ajunga asoshi terenlok tetenzüker asütsü, ta Deputy Commissioner, Peren, Sentiwapang Aier-i ashi.

Assam nung 'Swachhata Hi Seva 2021' agidar

Guwahati, September 20, 2021 (Agencies): Tawa Guwahati kübok NEDFi Convention Centre nung Swachhata Hi Seva 2021 tenzüka liasü.

Azadi ka Amrit Mahotsav shilem ama September 15, 2021 nü iba sentong ayongzüka liasü. India nüjiso ngur küm 75 ajungba benjongmung nungtem nung, India sorkar ajanga linük tesem ajunga nung Azadi ka Amrit Mahotsav ayongzük.

Mahotsav shilem ama Ministry of Drinking Water & Sanitation, Ministry of Jal Shakti-i September 15, 2021 nungi October 2, 2021 tashi India tesem ajunga nung SHS 2021 ayongzüksü aser iba den külemi maparen balala inyaksü lemet.

Assam nung, SHS 2021 sentong kübok maparen talisa 'Satyagrah se Swachhagrah Rath Yatra', 'Shramdaan', 'Swachhata Jagriti Yatra' (Rallies), Swachhata Champions tem jangjateta aser Award agütsü aser Gram Panchayat tem den Samvad agütsü.

Swachh Bharat Diwas benjongmung den külemi iba sentong ya October 2, 2021 nung tembangsü.

Iba sentong nung Akash Deep, MD, SBM-G, Assam-i telok pelaa agizükba mapang pai, Azadi ka Amrit Mahotsav, SHS, Swachh Survekshan aser Swachh Bharat Diwas indang nükjidongtem telok dang rasa ashi.

DWSS, Deputy Director General, Hiranya Bora-i,

"Mapatong mashi ka takok angutsü asoshi bilemba nükjidong atalokdaksüba aser ajangzükba dak tuluka keta lir. Swachh Bharat Mission ajanga iba nükjidong ajangzükogo. Nüburtemi merükmejuba aser temang anepaluba tsütsü teinyaksü tongtibattem metetta akümba yong, iba mission Jan Andolan agi melen, ta ashi.

"Swachh Survekshan (Grameen) Survey takok angutsü imlaa atar, kechiyong tang tashi inyakteta alibattem asadagra state indang ranking nung asenoki jenjang tajungba ajangzükettetsü imlar," ta Bora-i shisem.

Bora-i, Assam nung nüburtem dang shilem tajung agütsü aser iba survey nung ochishishia telangzüba agütsü; aser state nungittsü asoshi mepishiogo.

Swachhata Hi Seva, koba Swachh Bharat Mission indang mapatong ka lir, iba ya ajanga merükmejuba (sanitation) tasa nung aroki shilem agütsü asoshi nübur timba atsüa arutsü nükjidong lir.

Taküm, SHS ajanga nüburtem dang libajen merüka ayutsü aser metsümeshidak junga yanglur amshiba yimya indang tongtibattem angazükdaksütsü asoshi ajungmesotsü nükjidong lir.

Iba mapatong takok angutsü asoshi, State nungi tenzüka district, Gram Panchayat, yimtsüngtem, lokti aser kija shia den külem sendaktepa alir ajaki shilem agütsü nungdaker aser yimtsüng ajak ODF Plus

kümtsütsü asoshi, ajak longjemer inyaksüla.

Swachh Bharat Mission (Gramin) indang metetdaksüba mapang, Assam, PHE minister Ranjeet Kumar Dass-i, "Merükmejuba, temang anepaluba aser tzi kümdanga amshiba nungi rongsenketzung ajungkettsüba aser temang anema aliba tsütsü nübur libaliro ajungkettsüba ajanga lokti ajungtsü asoshi Swachh Bharat Mission-i inyakdar," ta ashi.

"Assam kübok yimtsüngtem nung, Swachhata Hi Seva ya sobaliba ka ama aser yimya ka ama nüburtemi inyaka aru. Ajisüaka, libaliro melenshia aoba ajanga iba yimya samaodaki. Swachh Bharat Mission tenzüka ajanga, merükmejuba aser temang anepaluba maparen tanaben tenzüksi aser Jan Andolan agi melenogo. ODF plus tsütsü tekümdangtsü tali sangdongtsü asoshi Swachhata Hi Seva campaign kübok onoki maparen aika inyaksü asalentong yangluogo," ta Kumar-i ashi.

Maneni, iba sentong temer mapang sülen, "Satyagrah se Swachhagrah Rath Yatra" tenzüka liasü, kong Assam indang district ajungalen ODF takok ngua inyaksü aser metsümeshidak shitak yangla amshitsü indang nung tekümdangtsü sangoktsütsü sentong lir.

Iba campaign tenzüka shilem ama, Tatimara nung DWSC Kamrup (Metro) ajanga Shramdaan maparen inyaka liasü.

MENUNGRA BILEMTETTER



ASÜR L. MASAKALA IMSONG
Tasüba Anogo: 21.09.2020

Temeim Oja, nai iba akümli toktsür or tanü küm ka ajungba anogo nung ne temeim, taremsük, ajemalu aser ne tamang sarasadem onoki menungra bilemtetter.

- Temeim Chirurtem, Semchirtem & Kinungertem

Tripura nung African Swine Fever putetba ak tepseter



Agartala, September 20, 2021 (Agencies): North Tripura district administration-i Kanchanpur yim nung ak tepsettsü tenzüko.

Iba yim nung aliba ak dak African Swine Fever (ASF) putetba sülen ketdangsurtemi tepseter. Guwahati nung aliba Northeastern Regional Diseases Diagnostic Laboratory (NERDDL) nung sample tendangtsü bener yokba

nung ASF aliba puteta liasü. North district kübok Kanchanpur ya Tripura nung AFS adokdak ta sangdongogo.

Tang tashi nung ak 96 tepsettsü jangjatetogo. Iba atema ak metsürtem nem teyari agütsüogo ta osang ajanga ashi.

AFS keta aliba ak tepsetba sülen tashidak menatepa maotsü atema ali nung ongken talang tur aremer.

Assam: World Rhino Day nung güntok tezüttem rongdoktsü



Bokakhat public playground nung güntok tezü rongdoktsü atema mimong ka yanglua aliba angur.

Bokakhat, September 20, 2021 (Agencies): Assam forest department-i Bokakhat public playground nung güntok tezü 2,479 rongdoktsü sentong lir.

Güntok tezüttem ya state kübok tesem balala trok nung yua lir aser September 22, 2021 World Rhino Day nung Assam chief minister Himanta Biswa Sarma matsüngdang rongdoktsü.

Wildlife (Protection) Act 1972 kübok Assam Sorkari State balala nung yua aliba güntok tezü, shidi tepo aser arem shiruru indang temang

shilem tangatem rongdoktsü telemtetba agiogo.

Güntok tezü, shidi tepo aser arem shiruru indang temang shilem ajak Morigaon, Barpeta, Mangaldai, Guwahati, Tezpur, Nagaon, Kaziranga aser Golaghat indang government treasury nung yua lir.

High-level committee kati güntok tezü 2,623 shi jangjaogo aser iba nungi tezü 2,479 rongdoktsü ta Forest department-i metetdaksü.

World Rhino Day anogomung nungtem nung Assam forest department-i

nübur matsüngdang güntok tezü 2,489 rongdoktsü.

Tezü rongdoktsü asoshi Bokakhat public playground nung gas ajanga amshiba mimongtem anepaludar.

Bokakhat public playground nung State indang Chief Wildlife Warden, MK Yadav tetuyuba nung güntok tezü rongdoktsü asoshi maparen achaaangdar.

State government treasury trok nung yua aliba güntok tezü 2,469 ji Kaziranga National Park indang treasury-i belener aotsü.

Guwahati anasa shidii nisung ka ajemset

Guwahati, September 20, 2021 (Agencies): Assam kübok Guwahati anasa arem shidii nisung ka ajemset.

Hombarnep Rani Reserve Forest temalen iba lendong ya atalok.

Shidi agi ajemsetsangji arishi küm 34 tain Rajib Boro ta jangjaogo aser pa ya Guwahati anasa Palashbari nungi liasü.

Osang angashili forest ketdangsurtem tesemtonga ao aser parnoki Boro ji Rani

Community Health Centre-i anir ao saka pa süadoker liasü.

Assam Forest Minister Parimal Suklabaidya-i Rajib Boro asüba atema temolung raksaba osang metetdaksüogo.

Tanü-asüing Guwahati anasa arem shirurtem nisung alidaki arua timtem agütsüba aiben ataloker.

Nisungtemi arem atsünga agia liyonga aoba ajanga iba tensa ya ajurur ta mongintemi ashir.



TIR YIMYIM YIMOBILEM (EDITORIAL)

DIMAPUR SANGTENNÜ, RONGJUI(SEPTMBER) 21, 2021

Meimlabaka ataloktsüa akok

Naga nunger ajak asoshi mulung anisüngzük kaji, mapang kenpiga India government o NSCN-IM telok na majurutepteti aruba sülen tang India government-i lenchi aruagi nisung melener Naga yimten ken o jembishi tenzükogo, anungji Naga yimten nung memenui temelenshi kabo ataloktsü imlaa atar. Ajisüaka, tebilemstü kaji, Naga nungertemi imlaba amato mesüika, state agi, Jammu & Kashmir amato, Union Territory-ang anasemka kümstü nungbo koma süla (?) ta taoba hopta piyong asenoki bilemdanga shisalemsatepogo. Atangji, yamajibosa mataloktsü imlar saka ataloktsüjia kecha meteta mali. Naga yimten tebilemstü tatem küma latettsüba ya mapa temela masü, kanga tejen ken o, tebenja aser kanga tasak. Naga nungertem Myanmar nung alirtemji khen yutsür, India küboka state pezü tashi nung sükshia lir. Ano, tebenja kaji, Naga ta asüba ya shilu ka dang masü saka benteter mebentetma aika lir aser shilu shiagi oshi ka dang masü saka yimtsüng shia amato oshia balala lir. Aji oda, Nagaland nung aliba Naga nunger, Manipur nung aliba Naga nunger, Arunachal nung aliba Naga nunger aser Assam nung aliba Naga nungertem Naga nungersa süaka tebilemba aser taginüba balala lir. Iba jagi yimten nüchiso bushirtema telok ka küma longjemstü melen, joko tangbo, telok ti tuku tashi küma odagi. Ibaji dang masü saka tema nung alirtema Naga nunger ajak adenba lokti telongjem tentetbo kata maka kümogo. Aji oda, lia lia Naga Hoho-a azüngazünga kümogo aser NSF ama kaketshir telongjem nunga Nagaland nung anüdoklen aliba kintembo kata maden kümogo. Ibaji tanü Naga nunger yimten aser loktiliba tia lir. Iba ama telongjem makaba kin ka asoshi ajaki hau junger ta agizüktettsüa telemtetba ka bener arutsübaji tasak dang masü saka tamakoktsü mapa ka lir. Ajisüaka, Nagaland nung yimsüsürtemi anir Naga nunger ajaki iba ama ajaki junger ta agizüktettsüa telemtetba ka arutsü imlaa atar. Idangji dang, Naga nunger ajaki yimten telatetbaji agizükttsü aser idangji dang, tang Nagaland tatar senden nung temendak purtemia mena aliba tatar mendenji peisasa azüngtetsütsü. Naga nungertemi iba ama mapangji ka arutsü ta amanga atabaji peisasa pei ashioktsür asütsü. Tanga Nagaland nung aliba Naga kin temeja telongjem ka tentettsü asoshi meranger saka iba telongjem nungjia anüdoklen alir kintembo metentettsü ta metetdakttsüogo. Ibaji, ashiko, parnok tang aliba Nagaland alushi temakazük aser yimten yimsüsübaren nung ya masü saka parnok meten state balaka kümteta linüba tejangraba aser takangba India government nem agüja aliba agi asütsüa akok. Aji oda, Naga nungertemsa rongnunga kari yimten nüchiso jenjang nung latetner, kari tang aliba Nagaland jenjang ya temaba küma yanglushir linür, kari tang aliba Nagaland nungi balaka razüka onür, ano tang Nagaland küboki maitet kidanger state-tem nung aliba Naga nungertem asoshia yimten jenjang kabo alangtetsütsüla ta bilemdang dang, atangji, Naga nunger kin ka aser yimten nükjidonga ka ama züngshiaka, telemtetba katibo Naga nunger ajak mayimbangtetsü. Aji oda, tang Nagaland nung alirtem rongnungsa asüyonga anüdoklen aser anülulen taginüba ola balala, ano Manipur nung alir Naga nunger o Assam aser Arunachal nung alir Naga nungertem na taginüba balala asütsü. Iba tiajiang Naga nunger asangsang tia lir, anungji Naga yimten jenjang tasen ka latettsübaji ajaki junger hau ta agizüktetba telemtetba ka masü saka Naga nunger liso küma alidak tesem balala nung alir Naga nunger telok shiai pei alidak Naga yimten komaka latetner ta asübjiang kanga tongtibang asütsü. Iba tangattetba nung kodang Naga yimten latetdir, atangji, state masü Union Territory-ang asem pezüka kümstütsüa akok. Ashiko, tang ama state-bo ka dang saka government-bo aika ta ser alitsü agibo, Union Territory ka aser government ka kübok pei akok mapa sademsadema inyaka taküm linür teimba asütsüa akok. Aji oda, Naga yimten tebilemstü dak aketba ken o tejembir ka asoshibo ajak jembimar asütsü, iba jagi India o Naga nunger na yimten ken o tembangogo ta tezüluba nunga amshir aser tejembia jembir. Joko, Naga nungertem asoshi meimlaba ka atalok nunga agizüktettsüa temulungjang aser tekolok renema atatsübaji kanga ajak asoshi tongtibang kümogo.

OLEMSABANG

Atepzüng aser Arrtsü atena oa Tenyaba mapa nung liromedem

- Onenlemla

(Yashi adok nungi...)

Lokti terenlok asoshi lim arogo teinyaktsü

Koba arogo nung home mission asoshi temulung agütsür iba arogo tanela aser rongsen nung aintsü. Iba temoatsü yimzüka aluba ajanga arrtsü ajanga oa asenoki mapa tuluba inyaktsütsü ta imlar - Menji Jamir

Lim arogotemi Mungdang den yaritepa ABAM mission school tajungba kümdakja Tsüngrem tenzükter chirtem aser Aor tanurtem züngtetdak school tajung ka küma yanglushitsü nükla tajung ayutsü junger. Tanabuba nung, Impur mission hospital tajungtiba küma yanglutsü asoshi lim arogotemi Mungdang den yariteptsü kanga tongtipang. Kechiyong iba mission hospital tajungba küma yanglushitetra asenok asoshi dang masü anasa aliba district ana-ase asoshi kanga teyari asütsü, anungji ajak lungjemer iba mapa takok angutsü nükla yudi. Tasembuba nung, mission center nung sen aika indoka guest house yangludagi, au Impur ya Naga nunger asoshi dang masü alima ajak tenük ranglok dak asünung guest house nung sen indokba sasa-a mebelemla saka mission center nung nungdakba mapa inyakdang mission tamakok maludaktsütsü tangatetba alitsüla.

Lim arogo karbo tenlaki yangluba agi mission meinyaki anena ataba nguogo, lim arogo development aodang mission boardi mission sen agi arogo general yariba angashiogo, mission boardi mission sen ajak amshia pei arogo nung revival, youth camp aser retreat agütsüba arogo osang kaket nung züngogo. Tsüngremi Pa mission ataloktsütsü asoshi lim arogo jatetba amajok mekümdaktsütsüla. Lim arogo kati mapa tajung aika inyaktsü akok, saka mapa tajung ajakbo mission mapa masü ta tangatetba aser mapa tajung agi mission küpdoktsü makok ta tangatetba nung nungloktsüba mapa inyaktsüla.

Arrtsü atena or inyakba mission

Aortemi kinunger, adianu, mesüra medemer o medemer longjemer, mesüra ano telok balala tenteter bendangli mission inyaker aika adokogo. Ya mapa tajung saka Arogo majangiang inyaktsüsa ya koda asü? Ya mapa tajung inyakyim nung Arogo den amalitep nung inyakbasa tajungba asütsü. - Yanger (Nepal)

Arogo mission tali tajungba bener aotsü asoshi toklang tenzükertem mission training yoka mission inyakyim angazükdaktsütsü junger kechiyong mission yabo mapa küma inyaktsüba (practical and action) mapa. Kokra lim arogo tulu nungbo mission asoshi full time tenzükter ayutsüla.

Lim arogotemi mission lushi tasen yateta inyaktsü bilema lira rongsen aser development agi mesüzüka meinyaktsüla. Nüburtem rongdak nungdak (immediate needs) dak alaka rongsen tali amshia inyakba agi tanela anir aruba mapa nung tamakok aludaktsür. Maparen ajak nung nüburtemi akokba tajungtiba agi shilem agitsü sayutsüla, ibaji ajanga mapang tatakzük nung parnok sasa nokdaktetsü tangatetba agütsür.

Lim arogotem aser kibongtemi mission agencies balala den longjemer mission inyaker. Tenzüka aliba mission nung itasen agüja nübu yoker mesüra ita sen yoka par nisung yarir. Iba ama mission nung like-minded mission agencies asü masü metettsü tongtipang kechiyong arogo mangdang den meputepba mission telok aika alitsü aser parnok den som süra inyak nungbo lia lia mangatetep adoktsü. Tanabuba nung, kija mesüra kibong/kinunger longjemer missionary yokba, mission field lapoka inyakba dang nungibo mungdang aser arogo telungjem ajanga inyak tajungba. Kibongtem, kijai yaritsü saka arogo/mungdang ajanga inyaktsü tim.

Anogo shia yimtsüngtem nungi yimtemi mapa bushia nüburtem meyirjang aika aor (migrates), anungji yimtem nung kin aser oshi tapu ajak lir. Parnokji tongtetsü asoshi missionarytem yoka arogo aser sarasadem tesepe tenteta inyaker saka iba mapa asoshi arogo rongsen peria alitsü nungdaker. Tanü putu nung iba urban mission ya takok ngua otagi. Arogoi iba tenyaba mapa nung shilem agitsüla.

Lim arogo aser telok balalai foreign mission tenzüka aoba angur. Asenok nübu tajung aika lir saka rongsen nung tangar memeneba state asü nung asen rongsen bener oa inyaktsü masü nübu yoka tangar teyari agia inyaktsü leman bushitsüla. Tanabuba tebilemstüji, India Rupee aser bendanger sen value kenyungi balala lir, Tat. agi. India Rupee ita sen ita nung lakh ka (Rs.1,00,000/-) agütsü nung US Dollarbo 1,342/- shi dang lir, aser China Yuan 8,656/- shi dang lir. India nungbo sen aika amai, saka tanga lima nungbo par taliba jenjang metongteter. Iba ama sen value masadangi missionarytem yokra aser par jenjang nungji magütsüra missionarytemi timtem aika ajurur.

Muslim, Buddhist aser Communist limatemi missionary yokba aika lir. Missionarytem taküm yimya nung Yisu ajitetdakttsütsü alitsü, saka odia Osangtajung mejembtsüla. Taküm aser mapa ajanga Khrista kuli sütettsüla. Iba ama jakatem nung lim arogotem rongsen aser mapang indokba aser tajangzük, asadanga inyaktsü lim arogotemi metettsüla.

O tembang

Tsüngremi lim arogo nem nungloktsüba wadang tulutibaji missiom. Taküm aliba arogo kati mission meinyaki metoktsütsü, koba arogoi mission mapa nung shilem agitsü mejangrar iba arogoi tanela nung tasü. Tenyaba mapa liromedema bener aotsü asoshi lim arogo majangi kija aser kibongi mission metenzüktsüla, ter shilem pei aliba arogo nem agütsütsüla. Yamaji lim arogo nükjidong tulutibaji tenyaba mapa ya asütsüla yangji atepdang aser arrtsü atena oa inyakba anaprongla lir. Yisui sayuba aser inyakba mission nung tanela aser taküm rangben tekümtet asoshi inyakba ama timtemer yariba, taküm jenjang yanglutsüba den tekümtet jenjang angatetdakttsütsü lim arogo nükjidong asütsüla. Ano arogo nung tantsür tambur leni maor, temang nung matamabensar den day care amala tenzüka mapang ajak nung sarasadem telongjem, shisatsü aser rongsen agi arogoi yaritsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Myanmar nung aliba Baptist Arogo ka nung pastor ka khaset



September 18, 2021 nü Myanmar nung Chin state kübok Thantlang jila nung Chinland Defence Force aser Myanmar sepaitem tsüngda raraba sülen sepaitemi nüburtem meyong ki rongdoktsüba noksa nung angur.

September 20, 2021: Myanmar kübok tang tensa kanga mejungi aliba Chin state nung sepaitemi Khristantem timba ser civilian amakba mapang nung pastor ka khasetogo.

September 18, 2021 nü Myanmar nung Chin state kübok Thantlang jila nung sepaitem aser Chinland Defence Force densema democracy pusemer teloktem tsüngda kanga sashia raraba sülen sepaitemi ki 19 rongdoktsügo.

Ki arongba mapang nungji Baptist Arogo ka nung Pastor, Cung Biak Hum-i mi enseptsü merangdang sepaitemi pa khaset, ta Khristantemi metetdaksü.

Chin Baptist Convention (CBC)-i sepaitemi civilian kitem raksatsüba aser pastor khasetba sülen pa temeyong nung inoka aliba kiyimba kuri (wedding ring) auyaba atema sashia aitsüogo.

September 19 nü CBC-i sangdong ka ajanga, "Sepaitemi

Tenla kitem amakba, Tenla kitem nung jenoka aliba aser Arogo meyong kiojentem raksatsüba den civilian kitem raksatsübaji tamangba yimsü aser tamangertem mezüngmeshiba lir," ta metetdaksü.

UN special reporter on Myanmar, Tom Andrews-i twitter ajanga, "Chin state nung aliba Baptist Arogo nung pastor ka khasetba aser civilian kitem raksatsübaji sepaitemi Myanmar nüburtem anema inyakba tatishitsü ka lir. Alimai tenük yoktsüla aser teinyaktsü tim inyaktsüla," ta ashi.

Rara ajanga Thantlang jila nung nisung 10,000 shi Hakha jila aser Mizoram state-i jena ogo.

Taküm, talisa July aser August ita na nung Chin state nung sepaitemi Catholic aser Baptist Arogo indang Tenla kitem nung jenoka aliba sülen Tenla ki toktsür apusodangbo Tenla kidang aliba osettsüset aika raksatsü.

September 14 nüa sepaitemi amakdang Thantlang nung

Baptist Arogo Tenla ki ka shells agi raksatsü aser nisung aika yirua liasü.

Rara ajanga Chin, Kayah, Karen, Kachin aser Shan state tem nungi nisung 20,6000 shi jenshiogo aser linük nung nisung million 3 dak temai teyari balala nüngdaker, ta UN Office for the Coordination of Humanitarian Affairs-i metetdaksü.

Myanmar nung sepaitemi yimsüsüba anema nokdaba telok balala anema sepaitemi ano tesashiba raratsü tenzükogo aser iba ya ajanga nüburtem ang taliba akoksatsü.

Anüolen aliba linüktem aser Southeast Asia nung aliba linüktemi Myanmar linük nung rara anentsü mepishir saka sepaitemi parnok anema nokdakba teloktem anema dang masü saka nüburtem anemaa rarar.

Taküm February 1 nü sepaitemi democracy lenirtem apuba sülen sepaitemi yimsüsüba tenzükter tang tashi nung nisung 1,100 dak tema tepsetogo.

Khristantemi India Tir dang Khristantem kümzüksü mepishi

September 20, 2021: Madhya Pradesh nung Hindu nungertemi Tenla kitem bendoktsütsü, ta amokmerenba sülen Khristantemi India Tir dang Khristantem meyong kiojen kümzüksü mepishiogo, ta Arogo lenir kati metetdaksü.

"Vishwa Hindu Parishad (VHP--world Hindu Council] nungi densema Hindu yimsü alia amangertemi Tenla kitem ya ozüng alema asü, ta shia September 26 tashi nung Tenla kitem bendoktsütsü ta onok amokmerenogo," ta Madhya Pradesh state kübok Jhabua district nung aliba Protestant Shalom Church nung tongti putir, Paul Muniya-i metetdaksü.

Iba district nung tribal nütsüng aika lir. VHP-isa lisopur Khristantem dang Hindu yimsü dangi tanaben meyipang ta tuyuogo, ta paisa metetdaksü.

"September 17 nü onoki district collector ajanga India Tir, Ram Nath Kovind nem temepishiba shidi ka agütsüogo. Onoki Tir dang lisopur Khristantem kümzüksü atema mepishiogo," ta Khristan putirisa metetdaksü.

Muniya-i ashiba agi, local administration-i Hindu right-wing telok balala den longjemer Khristantem anema inyaker.

Madhya Pradesh nung aliba Catholic Arogo nung public relations officer, Maria Stephan-i, district nung Revenue aser police napronglai Khristantem anema inyaker, ta ashi.

Tan hopta osangbener den jembidang Maria-i, "Khristantem ya yimjung meimertem lir. Ozü loktiliba nung yimjung aser tesünep alitsü atema onoki teyari meshir. Hindu right-wing tangatetba alir nija aser tentet kari yimjak nung

Khristantem dang Tenla ki bendoktsütsü ta sangdonger," ta metetdaksü.

Putir Maria Stephan-i, onoki ozüng alema tamangba yimsü memeyipdaksür aser tamangba yimsü shimtsü atema linük temzüng ajanga nisung ajak nem temeden agüja lir, ta ashi.

Putir Muniya-i, "Ozüng alema Tenla kitem yanglu asü nungbo administration nem teinyaktsü tim inyakdaksütsüla, saka kechiba nija aser tentet kari Tenla kitem benokdaksü ta amokmerener," ta asüngdang.

Paisa, "District aser state nung tanga yimsü balala amangertem indang tekülem kitema bendoktsütsü asü?" ta asüngdang.

Pai state Angh aser chief minister na dang iba teblemtsü onük nung tiyongtsü aita inyakba ajanga tensa süngjemdaksütsü mepishi.

ANOGO ABEN TSÜNGREM DEN

Shisatebulu, tenüng sangang

Kecha nung temulung tatema saka ajak nung sarasademba aser temepishiba aser tenüngsang agi nenoki mepishiba Tsüngrem metetdakjang.

Filipi 4:6.

Mathi 6 nung Yisui tenem nung sayutsüngiba mapang nübur dang shisamebulutsü ashi. Kechi achitsü mesüra kechi abentsü shisa tebulu. Nenok taküm asoshi shisa tebulu. Asüng asoshi shisa tebulu. Idangji Yisui ashi, parnok kotaker Tebui parnok nüngdak ajak agütsütsü ta ashi. Pauli ibai tatsü küma tejangja ratetta ashi. Kecha nung temulung makai teli! Ne mapa asoshi shisa tebulu; ne temang asoshi shisa tebulu; rongsen atema shisa tebulu. Kechiba? Shisabuluji temenen ka lir aser ibai amangba den mesüktepa lir. Kodang shisabuludir iba jagi Tsüngrem dak tamang makaba sayur. Tsüngremi alushijak anebalur aser arem naro nem abendaktsür süra shirnoki Pa meimer parnok nem sempet tajung magütsütsüa ma? (Mathi 7:11).

Shisabolui ne temang raksatsür, ne tebilembatem chimatsür, tangar den libaliro nung timtemdaksütsü aser ne tamang ilaa kümdaksütsü. Anungji Pauli iba nung ne taküm koda alitsü maneni ashir. Kodang ne dangi shisabulu arudir aji metettang, anenang aser sarasademang. Na shisamebulur saka iba tia nung nai Tsüngrem dak amanger ta Pa nem metetdakjang. Ne nüngdak Pa dang shiang aser tenüngsang agüjang. Pai tabensa sempet tajung agüja kar. Pai ne nem par jabaso agütsü aser ne shisabulu toktsüdang Pai ne nem masadangtetba tesünep agütsütsü (t.7).

Tsüngrem, ni iba mazüngi aliba taküm ajanga jajadang, anogo shia Ne dak amangtsü yariang kechiaser Nai ajak azüoker.

Taliban-i nisung aika tepsetdar: Missionary David Eubank

September 20, 2021: US inyakertem aser parnoki sepaitemi Afghanistan toktsür magizüktetba melungtet telok aoba sülen ano ita kata majung, (NGOs) balala nung inyakertem densema lir," ta paisa metetdaksü.

Afghan nunger yaritsü atema tang pa Tajikistan nung oa lir.

Paisa, "Nisung aika tepsetogo. Tawa khen nung nisung 30-40 shi külemi tepsetba noksa aika ni nguogo," ta metetdaksü.

Interview ka nung jembidang missionary-i, "United States-i tim mesüi iba linük toktsür ogo aser nangzükba ama meinyak. US-i America nunger densema nisung aika anir aotsü ta nangzük saka parnok meyrjang aika toktsür ao," ta metetdaksü.

Tajikistan nungi phone ajanga jembidang pai, Afghanistan nungi Afghan nunger aika Taliban dang nungi jena arua Tajikistan nung jenokdar, ta metetdaksü.

"Tang parnoki [Taliban] nisungtem bushidar aser parnoki tsükchirtem, ta züngshiba tenüng ajak bendendar. Tsükchirtem rongnungji US sorkar den külemi inyaksema arurtem, taoba Afghan sorkar den

Yaküm interview ka nung jembidang Eubank-i, "Yisui ni asoshi tajung inyakba ajanga ni ajungmesor, anungji ni Pa temeim lemsateper aser nüburtem dang Yisu sülen anidaksü atema ajungshir. Onok dak tetsübu aser asüküm mali saka Tsüngremi onok dang meimba temeim ajanga onoki takümtem kümzüksü aser temeim lemsateptsü atema rara aliba tesemtemi aoer," ta metetdakja liasü.


OLONG PAITEP # 5943

1		2			3		4			5
				6		7				
8										
						9				
			10							
11										12
					13			14		
15										
16								17		

TIPILEN		LANGTSÜNGLEN	
1. Nüji masü	- (4)	1. Jila tulu	- (5)
3. Techinütsüka	- (6)	2. Sarasademdang tembang	- (4)
7. Aketa shirangba	- (5)	4. Tarutsü indang ashirtem	- (6)
8. Pi	- (6)	5. Alia	- (5)
9. Amena	- (5)	6. Mojing	- (5)
10. Kinü	- (5)	9. Tai inyakba metet	- (5)
11. Tanang masü	- (5)	10. Medemer chijiba	- (6)
13. Lenmang	- (6)	11. Tatokba / Amadok	- (5)
15. Nübo tedi	- (5)	12. Anüngdang masü	- (5)
16. Tuoshi	- (6)	14. Jabaso masü	- (4)
17. Shiruru apuba temenatsü	- (4)		

OLONG PAITEP # 5942 TELANGZÜBA

TIPILEN :	LANGTSÜNGLEN :
1. Tesangra, 5. Mungo, 7. Kisen,	1. Temesen, 2. Raksa, 3. Aon, 4. Aso,
8. Salem, 12. Semki, 14. Kilem,	6. Nile, 9. Alizüng, 10. Omen,
15. Kensü, 16. Sangpang.	11. Lemta, 13. Ola, 14. Kin.



ALOKBA O JABASONA ASÜNGDANGTEPER

- Alokba** : Tebusang, joko küm anabuba s.o.p ta asatepba ya kechi dang ajaraka?
- Jabaso** : Alima nung meimchir onsaraba agi pi tashir lima kari S-tetüzü Sopetdangpetertem, O-tetüzü Okshia, P-tetüzü ponger odaktsütsü atema tzümetsüng wara tuluka yoksür nung meyiper nüchi Nisungang aika samaogo.
- Alokba** : Ano nenoki lock down tesa jembiba ya a kechi tetüzüaka?
- Jabaso** : Oba, asen ki anasa süng mill nung Süngtem tululu Tata gari nungi tsükdaktsüba dang ya log down ajar.
- Alokba** : Ano 50% tesa pang pet süa jembiba ya a kechiata?
- Jabaso** : Ena, tatishitsü agi Sentepkidang mesüra lokti balala meeting shiting nung mesüra school nung class ka nung tanur 100 aru nung Nisung 50 dang menang ta ashirbaaja,
- Alokba** : Süra asen yimdak aliba school nungbo class ka nung timba agi TANUR Asemadang amener, taji par asem rongnung shiba alangdangar ka sür tesadang koma arutsü, parnokji shikonga masü, Ngashia masüato ????????
- Jabaso** : O Oba Aloka !!!!!!!
- Lilir : I.Kilang, Ajem, Indisen,Dimapur,

TANÜBO NAI LANGZÜANG

Q. Thamirabarani River ya ___ nung lir.
 A.Tamil Nadu B.Kerala C.Karnataka D.Andhra Pradesh

(Taruba adok nung onoki langzüsü)

YASHI ADOK TELANGZÜBA : Ahmedabad

AO OSHI ANGAZÜKDAK:
TANÜ ANGAZÜKTSÜBA OJANG

Küptok
 (v) sentsüh meyipa agütsü (repay)
 * Mapa inyakba nungi sen aika anguba agi tangar dang sentsüh **küptok**.

Küptoknü
 (n) hapta nung anogo tenetnübuba (Saturday)
 * Lokti aikati **küptoknü** senden alir.

NAI-A YA METETTER MA?

INSTAGRAM SABANG NUNG 'FOLLOWER' TIMTIBA ALIR KAR:

1. Instagram	(419m followers)
2. Cristiano Ronaldo	(336m followers)
3. Dwayne 'The Rock' Johnson	(266m followers)
4. Ariana Grande	(264m followers)
5. Kylie Jenner	(263m followers)
6. Lionel Messi	(260m followers)
7. Selena Gomez	(258m followers)
8. Kim Kardashian	(250m followers)
9. Beyoncé	(204m followers)
10. Justin Bieber	(193m followers)
11. Kendall Jenner	(186m followers)
12. National Geographic	(182m followers)
13. Khloé Kardashian	(179m followers)
14. Taylor Swift	(176m followers)
15. Jennifer Lopez	(173m followers)
16. Nike	(171m followers)
17. Neymar	(159m followers)
18. Nicki Minaj	(155m followers)
19. Virat Kohli	(149m followers)
20. Miley Cyrus	(143m followers)

SUDOKU # 5984 **TELANGZUBA # 5983**

1	4	2		9				5	5	3	9	6	8	4	1	7	2	
7			4					8	9	6	7	1	3	9	2	5	8	4
8		5						2	4	8	2	4	5	1	7	6	3	9
2				4	8					3	8	7	9	4	6	2	1	5
	3			1	2	6				9	1	6	8	2	5	7	4	3
	8			7	2	9	4	1		2	4	5	1	7	3	9	6	8
	5		2	6						4	9	2	7	6	8	3	5	1
	2	8			9	4	1			7	5	8	2	3	1	4	9	6
	7	9	1		8	5	3			1	6	3	4	5	9	8	2	7

OJANG LUTEP # 5529

- IADOSÜKER :
- SAETSASA :
- DANALIG :
- GIBNUNO :
- TETDAAJING :
- NGMAPA :
- ITSHAK :
- NGNU :
- AKADINYOK :
- NGBTAJUA :

OJANG LUTEP TELANGZÜBA # 5528

AREMZÜKA ATABA DANG MASÜ KHEN KHENBO
TASA MELENSHIA INYAKTSÜ NÜNGDAKER

TAN HOPTA ATEMA - KOMA SÜLA ?

Q. Nagaland nung school-tem ya akhi ama lapokdaktsü nunga koma süla ?

Charanjit Singh-i Punjab Chief Minister tenangzükba agiogo



September 20, 2021 nü Punjab Bhawan, Chandigarh nung Punjab Chief Minister tasenba, Charanjit Singh Channi, AICC General Secretary Harish Rawat, PPCC Tir, Navjot Singh Sidhu aser Deputy Chief Minister tasen ana- Sukhjinder Singh Randhawa aser OP Soni nungeri osangbenertem den jembidang tangokba noksa nung angur.

New Delhi, Rongjui/September 20 (Agencies):

Hombarnü Charanjit Singh Channi-i Punjab Chief Minister inyaksü atema tenangzükba agiogo; pa state nung Chief Minister 16buba asütsü.

State nung Dalit nunger rongnungi mezüngbuba Chief Minister ji pa asütsü. Congress leniri Punjabi oshi nung tenangzükba agia liasü.

Chief Minister tenangzükba agiba sentong nungji Congress Party lenir, Rahul Gandhi, AICC General Secretary Harish Rawat aser Punjab Congress Tir, Navjot Singh Sidhu nunger densema liasü.

Sukhjinder Singh Randhawa

asere Brahm Mohindra nata deputy chief ministers inyaksü atema tenangzükba agiogo.

Hombarnep AICC Treasurer, Pawan Kumar Bansal-i, Punjab nung Deputy Chief Minister anaji Sukhjinder Randhawa aser Brahm Mohindra na asütsü, ta sangdonga liasü.

Tenangzükba agiba sülen Ato kilonser, Narendra Modi-i twitter ajanga, "Punjab Chief Minister tenangzükba agiba atema Charanjit Singh Channi nem tenüngsang agütsür. Punjab nunger atema maneni Punjab sorkar den longjemer inyaksü," ta metetdaksü.

Punjab sorkar official

website ajanga ashiba agi, Channi ya kümsük aseben tashi Municipal Councilor inyaka liasü, iba sülen kümsük ana tashi Municipal Council Kharar Tir inyak.

2007 küm mezüng pai Chamkaur Sahib menden nungi election nung takok angu aser 2012, 2017 elections nunga kasa menden nungisa takok ngua liasü. 2015 küm 14buba Punjab legislative assembly nung Channi ya Opposition Lenir shima liasü.

2017 küm pa Technical Education & Industrial Training, Employment Generation and Science & Technology Minister shima liasü.

UP sorkari benjung mongpu mapang tenokdangba kar agütsür

Lucknow, September 20 (Agencies):

Shardiya Navratri, Vijayadashami, Durja Puja aser Chehallum benjungtem mapang nung coronavirus wara prokba nokdangtsü aser tensa meraksatsü atema Uttar Pradesh sorkari tenokdangba kar metetdaksüo.

Hindu nunger benjung aika atongtsü mapang ana nung lir, aser item benjung mapang nung nisung kanga longsolongbenra coronavirus wara kanga proktsü, ta mongintem aikati tekümdangtsü metetdaksüo.

Uttar Pradesh Chief Minister, Yogi Adityanath-i state

nung wara prokba nokdangtsü atema state sorkari tuyuba ajakji shidak beshitsüla, ta metetdaksü.

Nisung aser gari senzüsempingba nung timtem madoktsüsa Durga Puja Pandal aser Ramlila pandals amenoktsüla aser süngyanglutemji akhi ama amenoktsü saka azünga aliba moapu nung amenoktsüla aser lokti tulu madenshitsu, ta sorkari metetdaksü.

Moapu sasep nung nisung adenshitsu aser süngyanglu bener oa indoktsü atema gari tila mamshitsu; süngyanglu

indokba sentong nung akok tashi nisung ishikati dang shilem agitsüla, ta sorkari metetdaksü.

Nisung ajaki mask agitsüla aser nisung o nisung na tsüngda tetsüngda itta alitsüla; tekülem kitem nung lemezüktsüba dang nungi nisung tali madenshitsu, ta sorkari metetdaksü.

Lokti adenshiba ajanga gari senzüsempingba nung timtem magütsütsüla aser temelung malemba garitembo mita repringtsüla, iba dak alia Motor Vehicles Act kübok özüngtem shidak beshitsu, ta sorkari metetdaksü.



September 20, 2021 nü Uttar Pradesh kübok Fatehpur district nung kaketshirtem Rind ayong ajanga rong nung mener school-i aruba noksa nung angur. Iba district nung anogo shia kaketshirtem dang masü saka aluyimertem aser aayangertem meyijang aika rong ajanga iba ayong ajangdanga mapai aoer.

UNGA nung India-i vaccine aser kiralongra onüktem süoktsü: Tirumurti

New York, September 20

(Agencies): United Nations General Assembly (UNGA) senden nung India-i kiralongra, vaccine aser climate change ama alima dak sendakba onüktem süoka jembitsü, ta UN Ambassador, T S Tirumurti-i metetdaksü.

76buba UNGA senden nung tongti onük anaji coronavirus wara aser Afghanistan tensa na asütsü imlar, ta India ketdangserisa metetdaksü.

Interview ka nung jembidang pai, kasa senden nung alima nung rongsenketsüng mainba, kiralongra, climate change, Middle East aser Africa nung aliba linüktem nung rara, Afghanistan tensa aser UN Security Council reforms atema jembitsü, ta metetdaksü.

Taküm UNGA senden ya Tir, Abdulla Shahid leniba nung September 14 nü tenzük aser September 21 nü tembangtsü.

Iba senden nung Mongolbarnü US Tir, Joe Biden-i jembitsü aser September 25 nü India Ato kilonser, Narendra Modi-i jembitsü.

"76buba UNGA ya India

atema kanga tongtibang. Alima nung terenlok atema India tongti ser inyaksü ta imlar, iba denji külemi UN Security Council nung züngsem ka ama India-i alima dak sendakba tongti onüktem atema ola adoktsü," ta Tirumurti-isa metetdaksü.

"Item onüktem rongnung climate change, Sustainable Development Goals, nisung ajaki melamela vaccine angutsü, sensak tia samatsütsü, rongsenketsüng asentenshitsu, tetsürtem nem tashi agüja yimsüsüba nung shilem agidaksütsü, kiralongra, yimjung yangluba, Indo-Pacific aser UN reforms densema lir. Atangji onoki iba atemaji jembitsü, taoba mapangtem nunga jembidago," ta Tirumurti-i ashi.

India External Affairs Minister, S Jaishankar aser tongti ketdangsertema New York-i arutsü aser

Jaishankar-i züngsem linük balala nungi Foreign ministers ajurutsü aser G-20 senden den külemi G-4 Foreign Ministers senden nung adentsü, ta paisa metetdaksü.



September 20, 2021 nü Kolkata nung Trinamool Congress lenir, Sushmita Dev-i Rajya Sabha elections nung tokteptsü atema nominations file asü dang tangokba noksa nung angur.

Linük nung school tem lapoktsü mepishiba ken o SC-i magizük

New Delhi, September 20

(Agencies): Class XII nung azünger kati Supreme Court dang school tem tanaben lapoktsü atema mapang telatet ka nung telemteba agitsü atema Centre aser state sorkartem dang tuyuang ta mepishiba liasü, ajisüaka Hombarnü Supreme Court-i temepishiba ken oji magizük.

"Vaccine agir alirtem mesüra magirtem ajak atema Public tesem tanaben lapoktetra school aser shisaliok rejutema tanaben lapoktsüla," ta temepishiba shidi nungji zülua lir.

Justice, DY Chandrachud-i aniba bench-i, school tem tanaben lapoktsü atema court-i state sorkartem dang tuyutsü makok, ta metetdaksü.

Temepishiba ken o benksang atema ken o jembitsür advocate dang bench-i, "Iba onük ya kanga tebenja, anungji iba telemteba agitsüji sorkartem melung. Supreme Court-i yimsüsüba shilem agitsü makok," ta metetdaksü.

Temepishiba ken o angadanga mapang nung Justice Chandrachud-i, "Onok ket nung scientific data maliba

dang masü saka linük nung coronavirus dak sendakba osang tejangja memetet. Sorkartemi tanurtem nem wara memenadaksüner. Onoki yimsüsüba shilem agitsü makok aser item ama onüktem nung telemteba agitsü makok," ta metetdaksü.

"Onoki koba tesem nung mesüra koba district tem nung coronavirus kanga prokerar memetet. Atangji tanurtem school-i tanaben aotsü nungdak, ajisüaka iba telemtebajibo state temi dang agitsüla," ta Justice Chandrachud-isa metetdaksü.

Bench-isa, state sorkartemi shilem lemsar school tem tanaben lapoktsü atema telemteba agiogo, aser item telemtebaji sorkari dang agitsüla, ta ashi.

"Court temi kanga kümdangtsüla. Onok ket nung data mali. Tanga linüktem nunga school tem tanaben lapok, saka kechi atalokar asenoki meteta dang lir. Tanurtema vaccine agitsü nungdak. Nenoki iba temepishiba ya meyipa agitsü akok," ta Justice Chandrachud-i advocate, Ravi Prakash Mehrotra nem metetdaksü.



United States nungi meyipa yokba Haiti nungertem Port au Prince, Haiti nung aliba Toussaint Louverture International Airport tonga aruba sülen tangokba noksa nung angur. Asylum bushia Haiti nunger migrants meyirijang aika Del Rio, Texas bushia arua liasü, saka ketdangsürtemi meyipa yoker.

Afghan tetsür activists temi women affairs ministry kima longkak ait

Kabul, Rongjui/September 20 (Agencies): Deobarnü Afghan tsür nisung 20 dak temai women's ministry kima longkak ait, koba Taliban-i shibangtsür Ministry for Promotion of Virtue and Prevention of Vice agi melentsüogo.

Tetsür staff temi ashiba agi, taoba ita Taliban-i sorkar atsüngba sülen parnok hopta ishika ministry nung mapa inyaksü atema meyipa aotsü merangdar, ajisüaka parnok dang kidangi meyipa aotsü dang shia arudar.

Ministry of Women's Affairs kima sign ya Ministry for Promotion of Virtue and Prevention of Vice agi melentsüogo.

"Ministry of Women's Affairs tanaben lapoktsüla," ta

longkak aiterem rongnung Baseera Tawana-i ashi. "Tetsürtem aginba tetezü meimchir aginba lir."

1996 küm nungi 2001 küm tashi Taliban-i Afghanistan yimsü asüba mapang tetsürtem school-i aotsü aser tetsürtem mapa inyaksüa memelai liasü.

Iba mapang Ministry for Promotion of Virtue and Prevention of Vice-i, Islam tamangba yimsü kübok temzüng ozüngtem benoka liasü, kong süoshi asema nung tetuyuba agütsüba aser yimjak nung nisung tepseta intokba densema lir.

Class tem nung tetsür aser teburtem bendanga mener angazükdaktsütsü atema primary school temi tetsür kar ao tenzüka sülen anogo ka lir

iba longkak aitba sentong ayongzük. Ajisüaka tetsür taintem school-i kodang nungi ao tenzüktetsü, iba indang osang tejangja memetet.

"Nenoki tetsürtem kidang nungi mainshidaktsüi tenokdangba agütsüba aser parnok school-i meyokba ajanga Afghan tsürtem ola amoksepa meyutetsü," ta longkak aiter Taranum Sayeedi-i ashi.

"Afghanistan nung aliba tetsürtem ya taoba küm 26 tejakdang aliba tetsürtem masü," ta laisa ashi.

Taliban ketdangsürtemi taoba mapang yimsüsüba ama tang parnoki yimsü masütsü ta tenangzükba agütsüogo, ajisüaka parnok inyakyim dak ajemdaker temulung meleme bilemer.

Russia nung university ka nung nisung ti khaset

Perm, Rongjui/Sept. 20 (Agencies): Russia linük kübok Perm yimti nung aliba university ka nung prangbong bena alir kati nisung ti khaset, ta ketdangsürtemi ashi.

Lendong agütsür ya Hombarnep university campus yagi aita injang khaloktsü tenzü.

Kaketshir aser tesayurtem university ki telung nung atsük aser kar window nungi pongzüka liasü.

Police temi lendong agütsüsang ya yirutsü aser puogo ta ashir, shiba kaketshir ka liasü. Iba lendong nung nisung 19 yiru, ta yangji aliba health ministry ajanga ashi.

Iba lendong ya linük yimtiba, Moscow nungi anüdoklen kilometer 1,300 shi pilar Urals nung aliba Perm State University nung anepdang 11:00 ako (par mapang) meta ataloka liasü.

Social media nung video

prokshiba nung kaketshirtem ki telung nungi window tem ajanga pei indang osettsüset merepzüka yokba sülen pongzüka liasü.

Lendong agütsüsang yagi social media nung pa kisüngi iba mapa ya inyaker aser iba mapa nung yimtenren mesüra tamangba yimsü tesendaktep kecha mali ta züli, ta osang kar ajanga ashir.

"Iba indang ya ni mapang talangka nungi bilema liasü, küm aika nungi bilema liasü aser ni jangraba mapang tongogo ta angatet," ta pai social media account ka nung ashi, koba mapang tatsüka lir indok.

Lendong agütsüsang ya university nung azünger ka ta jangjatetogo, ta Investigative Committee ajanga ashi.

Iba university nung tesayur kati ashiba agi, pa class-i aoba mapang kaketshirtem building ka nungi kati asemtepa oa liasü aser floor tanabuba nungi nisung kar pongzüka angu.

"Parnok tetsübu nung ola adoka pongzük. Kaketshir kati injang khashishir ta küdang ashi. Nia prangbong ola angashi aser nisung ajak tesem balalai prokshi. Ni building tanabubai kaketshir aliba bushia ao aser idangjia prangbong ola angashi," ta tesayuri ashi.

Perm University campus nung ki 10 shi lir, aser security service temi ki ajunga aser lenmangtem shibang, ta pai ashi.

Perm University ajanga social media network tem nung kaketshir dang classroom nung alitsü ajungshia liasü.

"Classroom nung nisung 60 shi lir. Onoki kishi shibang aser menden agi shibang," ta kaketshir kati osangbener dang ashi.

Küm tetenzüklen Russia nunger Kazan yimti nung arishi küm 19 tain kati injang khashishiba mapang nisung 9 takum samaja liasü.

Syria mitkar tekolakbai Jordan semdang

Amman, Rongjui/Sept. 20 (Agencies): Arütsü tensa indang jembitsü atema Syria defence minister-i Deobarnü Jordan semdang, aser ibai küm 10 shi jakdang kidanger linük ana yagi telok balala yaria Syria nung rara adokba sülen tang mezüngbuba alitsü, ta ketdangsürtemi ashir.

Southern Syria nung sorkar anemba telok tatembangba tanaben agitsü atema mitkartemi amakba aser Russia tiyongtsüi aita Damascus south tsütsü Deraa yimti azüoktsü merangba nemtema ayuba sülen senden ya amener alitsü.

Deraa tensa aser yangji kiralongraba aser temesepba mozü shibelenba anema raratsü asoshi jembishinütsü atema Jordan army tekolakba, Lieutenant General Yousef Hunaiti-i Syria Defence Minister aser Chief of Staff Ali Ayyoub ajuru, ta Jordan army ajanga ashi.

"Linük anaprong tebilemtsü kasa aliba asoshi tarutsü nung tesendaktep tali yanglushitsü atema senden ya amener," ta Jordan army indang sangdong ka ajanga ashi.

Tashiyim amshia yimsü asüba anema 2011 küm yimjung nung longkak aitba security forces temi nokdanga mepetmesü adoka civil war akumba sülen Syria army indang Iran nunger busemba elite Fourth Division temi iba tesem ya ita ana dak tema maka arur.

Jordan indang King Abdullah-i August ita Moscow semdangba mapang Russia Tir Vladimir Putin tenüng asang,

kechiaser Syria Tir Bashar al Assad-i aginüba ama Syria nung mangatetep Russia sepaitemi melenshija linük tesüngjamba kumdaktsü, ta shia liasü.

King Abdullah ya US tembar lir aser küm aika anüolen linüktemi busemba sorkar anemba teloktem yaria arur, shirnoki southern Syria nung yimsü süa liasü, saka Russia tayimtsü aser Iran-i yariba militia tem teyari amshia Syria mitkartemi 2018 küm iba province ya tanaben agia liasü.

Mapang ka Jordan nungi nok-o-nü aser teyari agia aliba telungpur meyirijang aikati parnok indang nok-o-nü meyipa agütsü, aser iba atema ya Moscow-i tongti shilem agia liasü.

Israel indang Golan Heights den arütsüa aliba tesem nungya Iran-i busemba militia tashi tuluba akumba nungi nokdangtsü, ta Moscow-i Israel, Jordan aser Washington dang shia liasü.

Ita tetenzüklen sorkar meyong sepaitemi Deraa tanaben agiba ajanga parnoki jila aser yimtsüng aika par küboki aiddaktsü.

Quneitra province nungya Lebanon indang Hezbollah telok lir, koba Deraa aser anüolen tsütsü Israel indang Golan Heights den arütsüa lir.

Syria aser Jordan mitkartem tsüngta jembishinüba nung tawa temesepba mozü shibelenba tali akumba indanga lir, koba Lebanon indang Hezbollah mapa, ta Jordan ketdangsürtemi tai tongloktür.

Canary asetkong nung volcano adok; ki 100 dak tema raksaogo

Canary, Rongjui/September 20 (Agencies): Spain kübok Canary asetkong nung volcano ka adoka ki aika raksatsüogo, ta ketdangsürtemi Hombarnü metetdaktsü. Hopta tatemi iba volcano pokteta adokba sülen lava yimzüka ayuba aser mokozü adokba ajanga nisung 5000 shi pei ki toktsür aotsüa aküm.

"Ki aika raksaogo," ta regional government otongdar kati AFP dang ashiba den parnoki lendong nung kiojen kwi raksa, ibaji jangjatsü atema bushisüngdangdar, ta ashi.

El Paso yimtsüng mayor Sergio Rodriguez-i ashiba agi, Cumbre Vieja volcano agi ki 20 shibo ajunga raksatsüogo, koba küm 50 tsüngda tang mezüngbuba Deobarnü pokteta adok.

"Iba tesem nung alirtem tangsa tangbo kidangi meyipa maotsü," ta pai ashi.

Spain nung media sangdong balala ajanga ashiba agi, volcano pokteta adokba sülen ki 100 shibo nembanger alitsü.

Volcano pokteta adokba sülen Spain Ato Kilonser Pedro Sanchez-i, United Nations General Assembly atema New York-i aotsü aliba athi.

Pai Deobar nikongtsütsü tensa asadangtsü atema volcano adokba tesem semdangogo.

"La Palma asetkong nung tensa apir sorkar tekolakbai UN General Assembly nung adentsü atema tanü New York-i aotsü aliba thinenogo," ta sangdong ka ajanga metetdaktsü.

"Service ajak angatetepa inyaksü renema lir," ta Sanchez-i tweet asü.

Local government sangdong ka ajanga ashiba agi, volcano nungi adokba lava ya tzüküm matong tsüngda asetkong southwest len nisung aliba tesem leni yima alutsü akok.

Lava ya ghonda nung 700 metres (yards) shi yimdar aser temperature ji 1,000 Centigrade shi lir, ta Canaries Islands Institute of Volcanology-i ashi.

13buba Music Awards of Nagaland 2021 atema nominee sangdongogo

Dimapur, Rongjui/ September 20, 2021 (TYO): Mepetmesü aser tenokdangba jenti liaka, Nagaland music industry-i wadang takok ngua bener aotsü asoshi maneni meranga inyaka arudar. Ibaji tanga kecha agia masü, saka Music Awards of Nagaland (MAN) atema nüburtemi jangrabangra tenüng agütsüba ajanga lir, koba küm nungi küm MAN atema entry timba akümba asadangteter.

Nagaland nung musician indang sempettem jangjatetta aser parnok maparen ajungmesotsü; aser music sapurtem den külemi iba takok nung pelatepsü nükjidong nung MAN sentong agir. Tang ama alima ajunga asungba wara dak sendakba nung timtem aika liaka, asenok maneni ajungmesotsü nükjidong nung parnoki bilemja inyaker aser parnoki temolung agüja inyakba maparentem asenoki tushitsüla aser pelashishia agizüktsüla.

Mapang agia junga asadangshiba (screening) sülen, taküm 13buba Music Awards of Nagaland atema teküboklen agüja aliba 'entry' 57 shimogo.

* EDM

- Ayo Konyak - Don't want you back (Lkr Music Records)
- JV Keli-o & Rylo - Aisle (VI-LO Studio)
- JV Keli-o & TS Geneses
- Maya (NestVibe)
- Valentina, GFRY, Phantom
- Everything is gonna be okay (Home Studio)

- Folk Fusion

- Chubatsür Jamir - Tsü n g r e m m o n g tsüngsangtepro (Resonate Studio, Mkg)
- Colored Keys - Beyond boundaries (Tribes Entertainment Pvt. Ltd.)
- Keduovituo Peseyie - A kecha kemengu (Infinite records)

- Tensumongba Ozukum - Lijaba (Tribes Entertainment Pvt. Ltd.)

* Gospel

- Aszo Naga - My first love (JRC Studio)
- Chubatemsu Kichu - Risen for me (Sound Art Studio)
- Imlong N - Everlasting God (Sound Space Studio, Maharashtra)
- Lima Nungsang - Faithful (Alive Jam Studio)
- Manhei N Konyak - Life is precious (JHC Records)
- Shane Kangzang - Chord of glory (Tribes Entertainment Pvt. Ltd.)

- Yanger Imchen - Never give up (Jam Studio 11)
- ZT Slingshot - Believe (Home Studio)

* Gospel (Hindi & Local Dialects)

- Aren Jamir - Yesu (Mar Ao Production)

- Imtisang - Oja (Jam Studio 11)

- Molungnen Longkumer - Tamang akangshiang (Home Studio)
- Nüthivolü Ringa - A kücho (CBCMHK)

* Hiphop/ Rap

- Anonymous Jamir Ft. Alo Zhimo - Emotions (Imliakum Studio)
- Gabriel Changlim - Zilch (Gabriel Changlim Studio)
- Kid Jinx - Now (NestVibe)
- Nentong Konyak - KOJ (King of jungle)(Alive Jam Studio)

- ZT Slingshot - Snippet (Clef Ensemble)
- ZT Slingshot - Top (Home Studio)

- Z world X Niloka Wotsa - Bad times (Home Studio)
- Z World Ft. Jpollnd - Die a legend (Mar Ao Production)
- Toshi Yimkhiung - On my mind (KL Pamei Studio)

* Pop (Solo)

- Benry Moses - Awake (Cosma Studio)
- Dieze Sothu - Pave a way (Jam Studio 11)

- Kevi Zumvü - Wish you all my love (JHC Records)
- KL Pamei - Zianmei (Element Indie Records)

- Meyisanen Lemtur - Break of dawn (Sound Art Studio)
- Sunep A Jamir - Guilty (Home Studio)

- Temsu Clover - Dumplings for the sad (Home Studio)
- The Kid Bovix - Fake Love (Rising studio)
- Yemkong Somba - Found love (Tales N Mix)

* Pop (Duo or Group)

- Kevi Zumvü Ft, Sarah Yepthomi - XOXO (JHC Records)
- Meyisanen Lemtur Ft. Jpollnd & Temsu Clover - Years gone by (KL Pamei)

- Novan, Juztino, Kevi Zumvü - One and only (Naga Beatz)
- Trance Effect - I'm on

your side (Ode Studio)

* Pop (Hindi & Local Dialects)

- Akham Wanglei - Sundhur Suwali (Alive Jam Studio)
- Alem Alia Jr Ft. Nungshitemsu Aichanger - Meyipang Yimjung na (Tribes Entertainment)

- Kumzuk T Jamir - Teimla (Lkr Music Records)
- Lange Ahnglam Konyak - Friendship day (Alive Jam Studio)
- Zekuosa & Vitouzo - Tsali (Aseu Chadi Home Studio)

* Rock (Alternative/ Indie)

- About us - Loaded love (Infinite records)
- Bozio Nienu - Lighthouse (Li Tsale Records)

- Dieze Sothu - Greatest myself (Jam Studio 11)
- KL Pamei Ft. Kute-ü Khutso - Falling (KL Pamei)
- Orange - This is not a love song (Lkr Records)

- Tito K Yeptho - Beyond the sky (Jam Studio 11)

* Rock (Metal/ Heavy)

- About us - Gimme gimme (Infinite records)
- Angh Ft. Wannynen Bezo - A whole (Music Bakery)
- MW Assemble Band - Freedom

- Trivet - Time is near (Home Studio)

Maneni, taoba küm ama, tetendanger (judging panel) temi lemtetba ama, category shia nung award tem agütsütsü terenemba lir. Iba den külemi technical category talisa Best Music Video, Best Video Director, Best Sound Engineer, Best Producer aser Best Songwriter nunga award agütsütsü.

Nominate asüba ken ajak Music Awards of Nagaland Youtube channel www.youtube.com/c/MusicAwardsofNagaland nung upload' asütsü, kong item ken reprangtetsü aser views' timba nomination ken ajanga Song of the Year award angutsü.

MULUNG NEN O

Filipi 1:21

'Kechiaser ni asoshi taküm alibaji Khrista, aser tasütsüji tajangzük lir'



ASO:
8th Oct. 1993

ASÜ:
16th Sept. 2021

Onoki teti meima aliba Asür Imlilemba Aier (Süngratsü), anojungi 16th Sept 2021 anogo akümüli tembanger onok mangyima alidang kija, kibong, Arogo aser lokti shirnokisa sarasadem, rongsen aser nübu agi yariogo, nenok ajak dang pelaba iba sabang ajanga lemsateper.

Tsüngremi nenok ajak moajangma.

Temeim Tsürabur, adianu, aser kinungertem

Office of the

Mangmetong Watsü Telen

Mokokchung, Nagaland

AITSÜR

Yimyu Ward nung alir Wt. Easter, W/o Wb. Imtioza Mangmetong, 14th Sept. 2021 nü asen sobaliba agi memelaba yimya nung, kima yimdong nung tepseter yuja aliba ya, ozü watsülartermi khu-khua aitsür aser nemjema mang ayimer.

Aibelenertemji tekeratiba nung temzüngi melaba ama tapet temerenshi agüjang ta ayimoktsür.

Sd/-
Wt. Tiakala Tzüdir
President

Sd/-
Wt. Moarenia Jamir
Secretary



Office of the

UNGMA SENSO TELONGJEM

Kohima : Nagaland

Regd. No. H/RS-1140 Dt. 17.10.2000

Tenüngsang Agütsür

Ungma Senso Telongjem Kohima züngsem nungi item senso pur nem parnok takok tulu anguba asoshi Ungma Senso Telongjem Kohima ajanga tenüngsang agütsür.

- 1) Asür Pangerkumzuk Lkr, jabaso Wb. Imtiangshi Lkr Directorate of Prisons Government of Nagaland nungi Deputy Inspector General of Prisons menden angu.
- 2) Wb. Kojangkoba Lkr jabaso Wb. Masatuba Lkr Peon, Directorate of Rural Development Government of Nagaland nungi Governor's commendation certificate award 75th Indian Independence day 15th August 2021 nung angu.

Tsüngremi parnok wadang nung maneni moajangma ta sarasademtsür.

Sd/-
Chubamayang Jamir
Tir, USTK

Sd/-
Temjensowa Jamir
Tongti Zülur, USTK

Longleng nung training ka ayongzük



Longleng, Rongjui/ September 20, 2021 (TYO): Honibarnü (18.09.2021), EAC Hq Sakshi Block, Longleng nung District administration (BBBP) & MSK Longleng ajanga molok atakba aser pickle yangluba nung Skill Development training ka ayonga agiogo, ta sangdong ajanga metetdaksü.

School tema maziing/tom nung School toktsür tetsürtem aser mapa mangu alir tetsürtem atema iba training ayongzükja liasü.

Iba sentong nung, EAC Sakshi block, Ruokuosetuo-i, mapa inyakba tasa tajungba melenshitsü aser tangar dak dang memetaloki pei sasa inyakba ajanga pei poksüng atema aazüktsü asoshi iba

amala maparen ya maangka ama agizüktsüla ta shilem agirtem ajungshiogo.

SDO(C) Longleng, Trongdiba Tongpi-i, training nung shilem agirtem dang tangar teyari magii pei sasa inyakteta peria aliba tetsür ka ka akümtsü merangtsüla, ta ajungshia liasü.

EAC Hq Sakshi Block nung

tetsürtem asoshi iba amala training takok ngua ayongzükba asoshi, Head GB Sakshi-i District administration (BBBP) & MSK Longleng dang pelaba metetdaksü.

Iba training nung tetsür 30 agi shilem agiogo. Training nung tesayur temji (Trainer) Wanmei aser Shamei na liasü, ta kasa sangdong nung shia lir.

Nagaland U-19 tetsür Cricket Team sangdongogo



Dimapur, Rongjui/September 20 (Agencies): Nagaland Cricket Association-i Womens U-19 One Day Trophy 2021-22 atema tetsür U-19 Cricket Team nung asayartem sangdongogo.

Iba asayamung nung asayatem ajak Bhubaneshwar nung asayatsü aser @BCCI.TV ajanga Livescore update asütsü, ta NCA Hon secretary Hyunilo Anilo Khing-i sangdong ka ajanga metetdaksü.

Asayartem:
Alemienla (captain), Priyanka Karmakar (vice captain), Iluneule Zeliang, Pausamyile Hegui, Watinaro Pongen, Soyimkumla, Ssra Jamir, Kunti Subba, Bipila, Kehungzeule Kulim, Vipeni, Neelam Chaudhary, Litia, Roma Subba, Najmeen Khatun, Suzzane, Tsongdi, Tsukhenshi-S, Nuvetalu Nyekha, Vitna T Yeptho.

Support staff:
Ato Chang (team manager) Deepali C Patkar (Team

caoch)
Shyla Alal (Team S & C Coach)
K Kiboli Yeptho (Team physio).

Aasava mapanglem:
28-09-2021: Nagaland vs Arunachal Pradesh
29-09-2021: Nagaland vs Meghalaya
01-10-2021: Nagaland vs J & K
02-10-2021: Nagaland vs Sikkim
04-10-2021: Nagaland vs Manipur.

WTA rankings: Naomi Osaka top 5 nungi tuguogo

Paris, Rongjui/September 20 (Agencies): Hombarnü sayaba WTA rankings nung Naomi Osaka top 5 nungi tuguogo aser kasa mapang nung taoba world number one asayar Simona Halep-a maneni tsünglangleni lua jenjang asem asepzüka luogo.

Grand Slam pezü tashi koker alila Osaka jenjang pongububa nung aliba tang jenjang tibubai luogo. Halep shiba taoba hopta Constanta nung Toni Iuruc den kibong küma liasü la jenjang 14bubai luogo.

Ashleigh Barty maneni

temaba jenjang nung lir aser French Open akokla Barbora Krejckikova jenjang pongububai tuogo.
Danish tsür Clara Tauson-i Luxembourg nung taküm asayamung anabuba akokba sülen jenjang 18 tejakdangi tua jenjang 52buba tongtetogo.
Kasa mapang nung Italy tsür Jasmine Paolin-i Portoroz, Slovenia nung WTA title mezüngbuba akokba sülen jenjang 87 nung aliba 64-i tuogo.

WTA rankings:
1. Ashleigh Barty (AUS) 10075 pts

2. Aryna Sabalenka (BLR) 7720
3. Karolina Pliskova (CZE) 5315
4. Elina Svitolina (UKR) 4860
5. Barbora Krejckikova (CZE) 4668 (+2)
6. Iga Swiatek (POL) 4571 (+2)
7. Sofia Kenin (USA) 4413 (-1)
8. Naomi Osaka (JPN) 4326 (-3)
9. Garbine Muguruza (ESP) 413510.
10. Petra Kvitova (CZE) 4060.

BCCI-i domestic cricketer tem taa ajungkettsü

New Delhi, Rongjui/September 20 (Agencies): Board of Control for Cricket in India (BCCI)-i Hombarnü, COVID wara agi minprongba ajanga 2020-21 season masayatetba sülen domestic cricketer tem nem taruba season nung match fee den bendenloksema taa shilem 50 agütsütsü aser iba den parnok taa dena ajungkettsütsü, ta sangdongogo.

BCCI secretary Jay Shah-i Twitter ajanga ashiba agi, asayar tejentem shirnok asaya 40 dak tema nung

shilem agiogo, parnok taa 60,000 ajungkettsütsü aser kasa mapang nung U-23 asayartem taa 25,000 aser U-19 asayartem taa 20,000 ajungkettsütsü.

"Cricket asayar shirnok 2019-20 Domestic Season nung shilem agiogo, parnok nem COVID-19 wara agi minprongba 2020-21 season masayatetba sülen temenok ama match fee talila shilem 50 agütsütsü," ta Shah-i tweet asü.

Taoba küm Ranji Trophy masayaba ajanga senotsü

tsütsü timtem ajangshiba India nunger cricket asayartem aika iba ajanga anisüngzüksü. Hombarnü telemtetba mesangdong tsüngda Ranji Trophy nung first XI asayartem anogo nung sen 35,000 nguya liasü. Syed Mushtaq Ali Trophy atema BCCI-i asaya shia sen 17,500 agütsür.

BCCI-isa, tetsür cricket asayartem aser asayar tejentem nem asaya shia sen 12,500 agüja aliba melena sen 20,000 agütsütsü ta sangdongogo.

FIFA-i Biennial World Cup atema FA tem den sensaksemtsü

Paris, Rongjui/September 20 (Agencies): FIFA-i World Cup küm pezü sülen khen masü saka küm ana sülen khen asayatsü atema sensaksemtsü asoshi September 30 online ajanga sensaksem sentong ka akatsü atema football domestic governing bodies tem jaokogo.

International calendar melenshisü atema sentong aliba nung shilem ka ama iba onük ya FIFA member associations den sensak asemtsü.

"International match calendar ya tajungba küma yanglshitsü nüngdakba aikati benokdar," ta FIFA-i Hombarnü sangdong ka ajanga metetdaksü.

"September ita tetenzüklen confederation tem densema stakeholder tem ajak jaokba sülen taruba hopta sensaksem ka akatsü ayongzüko.

"FIFA-i September 30 nü online summit ka akatsü atema member associations tem jaokogo. Iba senden ya taruba itatem atema global aser regional level nung pei tebilemba benoka sensak asemtsü atema maongka rongnung ka asütsü," ta kasa sangdong ajanga metetdaksü.

Küm ana tsüngda World Cup

khen asayatsü atema March ita taoba Arsenal manager aser tang FIFA nung global football development tekolakba Arsene Wenger-i benoka liasü.

2025-2026 nungi tenzüka küm shia World Cup aser European Championship aser Copa America amala continental asayamungtem melenteba asayatsü atema iba tebilemdangba benok.

UEFA tir Aleksander Ceferin-i iba tebilemdangba ya khenyongi magizük aser Europe nung aliba linüktemi biennial World Cup nung shilem magitsü ta amokmerenogo.

South American confederation CONMEBOL-ia iba project ya tapet masü ta shiogo.

FIFA tir Gianni Infantino-i, küm ana tsüngda World Cup khen asayatsü atema telemtetba ka taküm küm tatemibo agitsü ta tenangzüka agütsüogo.

Taoba hopta FIFA-i, online poll ka sangdongogo, kong football fan temi World Cup tali asayatsü atema pusemba sayuogo. Aji süaka iba result aser alima kin balalai iba tebilemdangba anema nokdakba na meputep.

1buba 5 Men Cricket Tournament ayongzüka asayaogo



Dimapur, Rongjui/September 20 (TYO): Indian Fast Bowling Center, Dimapur-i ayongzüka September 20 nü mezüngbuba 5 men cricket tournament asayaogo.

Iba asayamung ya Cricket Court, IFBC, Dimapur nung asaya, kong team 7-i shilem agia liasü. Asayamung ya tennis ball amshia asayaogo.

Final asaya Bigshots aser DABA Youth Ministry na asaya aser Bigshots-i run 50 agi iba asaya koka liasü.

Asayamung nung Best

bowler naroküm Moakumzuk (DABA YM) nem agütsü aser Best Batsman naroküm Sanjay (Bigshots) nem agütsü. Maneni Best Fielder naroküm Impang (DABA YM) nem agüja liasü.

Asayatem ajak "Cricheroes" app ajanga live sayuogo.

Kasa mapang nung asayamung ayongertemi ashiba agi, iba asayamung ya ita shia ayongzüka asayatsü. Parnokisa, IFBC cricket court ya mekazüka yur ghonda shia taa agüja amshitetsü, ta ashi.

BILEMDANGANG
"Telok nung shir nem kechi tagütsütsü tim, ajakji abensaa atajang."